

佛說甚希有經

唐三藏法師玄奘奉詔譯

如是我聞一時薄伽梵在王舍城住鷲峯山
 與大苾芻眾千二百五十人俱及無量菩薩
 諸天人等爾時尊者阿難於日初分為乞食
 故著衣持鉢入王舍城次第行乞遙見一所
 有大層閣營構初成嚴麗綺飾甚可愛樂既
 見是已內自思惟若有諸善男子或善女人
 能造如是高廣層閣嚴麗綺飾甚可愛樂奉
 施四方大德僧眾復有諸善男子或善女人
 於諸如來般涅槃後起窣堵波其量下如阿
 摩洛果以佛馱都如芥子許安置其中樹以
 表刹量如大針上安相輪如小棗葉或造佛
 像下如麩麥如是二種所生福聚何者為多
 爾時尊者阿難既作是念於王舍城次第乞

已出還本處飯食訖收衣鉢洗足已於食後
 時往如來所到已頂禮世尊雙足却住一面
 白佛言世尊惟我向者於日初分為乞食故
 著衣持鉢入王舍城次第行乞遙見一所有
 大層閣營構初成嚴麗綺飾甚可愛樂既見
 是已內自思惟若有諸善男子或善女人能
 造如是高廣層閣嚴麗綺飾奉施四方大德
 僧眾復有諸善男子或善女人於諸如來般
 涅槃後起窣堵波其量下如阿摩洛果以佛
 馱都如芥子許安置其中樹以表刹量如大
 針上安相輪如小棗葉或造佛像下如麩麥
 如是二種所生福聚何者為多故我今者請
 問世尊惟願如來哀愍為說爾時世尊以妙
 梵語告阿難曰善哉善哉汝今為欲利益安
 樂無量眾生哀愍世間諸天人等令得大義

利益安樂請問如來如是大義汝今諦聽極善思惟吾當爲汝分別解說阿難白佛唯然世尊願樂欲聞爾時世尊告阿難曰即於此方南瞻部洲縱廣周匝七千踰繕那北闊南狹形如車廂人面亦爾假使於中合爲一段或甘蔗林或蘆葦林或竹林等或復稻田胡麻田等叟塞充滿無有間隙如是假使徧瞻部洲或預流果或一來果或不還果或阿羅漢或諸獨覺叟塞充滿亦無間隙如甘蔗等若有一家於彼聖衆盡形恭敬承事供養奉施上妙衣服飲食卧具醫藥及諸資緣於彼一一般涅槃後如法焚身收其遺骨起窣堵波高廣嚴飾塗香末香熏香華鬘上妙旛蓋寶幢音樂燈炬光明讚歎供養汝意云何由是因緣彼所生福寧爲多不阿難白佛甚多

世尊甚多善逝爾時世尊復告阿難且置此方南瞻部洲於此東方毗提訶洲縱廣周匝八千踰繕那形如半月人面亦爾假使於中合爲一段或甘蔗林或蘆葦林或竹林等或復稻田胡麻田等叟塞充滿無有間隙如是假使徧彼東方毗提訶洲或預流果或一來果或不還果或阿羅漢或諸獨覺叟塞充滿亦無間隙如甘蔗等若有一家於彼聖衆盡形恭敬承事供養奉施上妙衣服飲食卧具醫藥及諸資緣於彼一一般涅槃後如法焚身收其遺骨起窣堵波高廣嚴飾塗香末香熏香華鬘上妙旛蓋寶幢音樂燈炬光明讚歎供養汝意云何由是因緣彼所生福寧爲多不阿難白佛甚多世尊甚多善逝爾時世尊告阿難且置東方毗提訶洲於此西方瞿

陀尼洲縱廣周匝九千踰繕那形如日輪人面亦爾假使於中合成一段或甘蔗林或蘆葦林或竹林等或復稻田胡麻田等曼塞充滿無有間隙如是假使徧彼西方瞿陀尼洲或預流果或一來果或不還果或阿羅漢或諸獨覺曼塞充滿亦無間隙如甘蔗等若有一家於彼聖眾盡形恭敬承事供養奉施上妙衣服飲食卧具醫藥及諸資緣於彼一般涅槃後如法焚身收其遺骨起窣堵波高廣嚴飾塗香料香熏香華鬘上妙旛蓋寶幢音樂燈炬光明讚歎供養汝意云何由是因緣彼所生福寧為多不阿難白佛甚多世尊甚多善逝爾時世尊復告阿難且置西方瞿陀尼洲於此北方大俱盧洲縱廣周匝十千踰繕那地形四方人面亦爾假使於中合成

一段或甘蔗林或蘆葦林或竹林等或復稻田胡麻田等曼塞充滿無有間隙如是假使徧彼北方大俱盧洲或預流果或一來果或不還果或阿羅漢或諸獨覺曼塞充滿亦無間隙如甘蔗等若有一家於彼聖眾盡形恭敬承事供養奉施上妙衣服飲食卧具醫藥及諸資緣於彼一般涅槃後如法焚身收其遺骨起窣堵波高廣嚴飾塗香料香熏香華鬘上妙旛蓋寶幢音樂燈炬光明讚歎供養汝意云何由是因緣彼所生福寧為多不阿難白佛甚多世尊甚多善逝爾時世尊復告阿難且置北方大俱盧洲天帝釋有大層臺其臺依止八萬四千眾妙寶柱一一寶柱籠以種種天青瑠璃妙寶珠網布以金沙灑以香水此臺復有周匝八萬四千眾妙寶

窓牖一一窓牖垂以種種天青瑠璃妙寶珠
簾布以金沙灑以香水此臺復有八萬四千
衆妙寶殿一一寶殿覆以種種天青瑠璃妙
寶珠網布以金沙灑以香水假使若有諸善
男子或善女人造妙層閣高廣嚴麗以天帝
釋妙寶層臺奉施四方大德僧衆汝意云何
是善男子或善女人由此因緣彼所生福寧
爲多不阿難白佛甚多世尊甚多善逝爾時
世尊告阿難曰且置四洲及天帝釋大寶層
臺假使若有諸善男子或善女人能造百千
俱胝層閣高廣嚴麗皆如帝釋妙寶層臺奉
施四方大德僧衆復有諸善男子或善女人
於諸如來般涅槃後起窣堵波其量下如阿
摩洛果以佛馱都如芥子許安置其中樹以
表刹量如大針上安相輪如小棗葉或造佛

像下如麩麥以前福聚比此福聚於百分中
不及其一於千分中亦不及一於百千分數
分算分計分喻分乃至鄔波尼殺曇分亦不
及一何以故阿難如前福聚其量雖多然不
及者爲諸如來於三大劫阿僧企耶修習無
量勝戒定慧及以解脫解脫知見皆圓滿故
如來無量慈悲喜捨十方六趣教化神通皆
圓滿故如來無量布施持戒忍辱精進靜慮
智慧及餘功德皆圓滿故以是當知造佛形
像及窣堵波所獲福聚不可思議不可比喻
爾時世尊告阿難曰汝當敬受如是法門阿
難白佛我已敬受未審如是所說法門其名
何等我當奉持佛告阿難今此法門名甚希
有能令衆生種植一切圓淨白法以是名字
汝當奉持阿難當知我自昔來數數曾爲天

良三

良三

九

龍藥又廣說乃至人非人等宣說開示如是
法門何以故世尊欲令如是種類諸衆生等
於如來所無倒恭敬種諸善根長夜獲得利
益安樂速成無上佛菩提故時薄伽梵說是
經已尊者阿難大苾芻衆無量菩薩及諸天
人阿素洛等聞佛所說皆大歡喜信受奉行

佛說甚希有經